

彊邨叢書



山谷琴趣外篇目錄

卷之一

念奴嬌

水調歌頭

滿庭芳

鼓笛慢

洞仙歌

雨中花

憶帝京

醉蓬萊

南歌子

驀山溪

轉調醜奴兒

品令

踏莎行

定風波

鵲橋仙

阮郎歸

更漏子

繡帶子

撼庭竹

卷之二

減字木蘭花十三

木蘭花令六

清平樂六

憶帝京二

畫堂春二

卷之三

鷓鴣天四

醉落魄四

南鄉子五

點絳脣

謁金門

采桑子三

西江月

鷓鴣天

漁家傲五

撥棹子

訴衷情

浣溪沙

菩薩蠻

調笑歌

步蟾宮

南柯子

二

醜奴兒

西江月

山谷琴趣外篇卷之一

南昌 黃庭堅 魯直

念奴嬌

八月十七日同諸甥步自永安城樓過

張寬夫園待月偶有名酒因以金荷酌
眾客客有孫彥立善吹笛援筆作樂府
長短句文不加點

斷虹霽雨淨秋空山染脩眉新綠桂影扶疏誰便道今
夕清輝不足萬里青天姮娥何處駕此一輪玉寒光零
亂爲誰偏照醺醺年少從我追遊晚涼幽徑繞張園
森木共倒金荷家萬里難得尊前相屬老子平生江南
江北最愛臨風曲孫郎微笑坐來聲歎霜竹

水調歌頭遊覽

瑤草一何碧春入武陵溪溪上桃花無數花上有黃鸝
我欲穿花尋路直入白雲深處浩氣展虹霓祇恐花深
裏紅露溼人衣坐玉石斂玉枕拂金徽謫仙何處無
人伴我白螺杯我爲靈芝仙草不爲朱脣丹臉長嘯亦
何爲醉舞下山去明月逐人歸

又

落日塞垣路風勁戛貂裘翩翩數騎閒獵深入黑山頭
極目平沙千里惟見琱弓白羽鐵面駿驄騶隱隱望青
冢特地起閒愁漢天子方鼎盛四百州玉顏皓齒深
鎖三十六宮秋堂有經綸賢相邊有縱橫謀將不減翠

蛾羞戎虜和樂也聖主永無憂

滿庭芳妓女

初綰雲鬟纔勝羅綺便嫌柳陌花街占春才子容易託
行媒其奈風情債負煙花部不免差排劉郎恨桃花片
片隨水染塵埃風流賢太守能籠翠羽宜醉金釵且
留取垂楊掩映廳堦直待朱轡去後從伊便窄襪弓鞋
知恩否朝雲暮雨還向夢中來

又茶

北苑春風方圭圓璧萬里名動京關碎身粉骨功合上
凌煙尊俎風流戰勝降春睡開拓愁邊纖纖捧研膏濺
乳金縷鷓鴣斑相如雖病渴一觴一詠賓有羣賢爲

扶起燈前醉玉顏。山攪胸中萬卷還。傾動三峽詞源。
歸來晚。文君未寢相對小窗前。

鼓笛慢 黔守曹伯達供備生日

早秋明月新圓。漢家戚里生飛將。青驄寶勒。綠沈金鎖。
曾瞻天仗。種德江南。宣威西夏。合宮陪享。況當年定計。
昭陵與子勲勞在。諸公上。千騎風流。年少暫淹留。莫
辜清賞。平坡駐馬。虛弦落鴈。思臨虜帳。徧舞摩圍。遞歌
彭水。拂雲驚浪。看朱顏綠鬢。封侯萬里。寫淩煙像。

洞仙歌 瀘守王補之生日

月中丹桂。自風霜難老。閱盡人間盛衰草。望中秋纔有。
幾日十分圓。風雨雲表。常如永晝。不得文章力。白

首防秋誰念雲中上功守正注意得人雄靜掃河山應
難縱五湖歸棹問持節馮唐幾時來看再策勲名印窠
如斗

雨中花送彭文思使君

政樂中和夷夏宴喜官梅乍傳消息待作新年歡計斷
送春色桃李成陰甘棠少訟又移旌戟念畫樓朱閣風
流高會頓冷談席西州縱有舞裙歌板誰共茗邀棋
敵歸來未得先霑離袖管絃催滴樂事賞心易散良辰
美景難得會須醉倒玉山扶起更傾春碧

憶帝京黔州張倅生日

鳴鳩乳燕春閒暇化作綠陰槐夏壽酒舞紅裳睡鴨飄

香麝醉此洛陽人佐郡深儒雅
況坐上玉麟金馬更
莫問鶯老花謝萬里相依千金爲壽未厭玉燭傳清夜
不醉欲言歸笑殺高陽社

醉蓬萊

對朝雲靉靆暮雨霏微亂峰相倚巫峽高唐鎖宮朱
翠畫戟移春靚妝迎馬向一川都會萬里投荒一身弔
影成何歡意盡道黔南去天尺五望極神州萬里煙
水尊酒公堂有中朝佳士荔頰紅深麝臍香滿醉舞裊
歌袂杜宇聲聲催人到曉不如歸是

南歌子

詩有淵明語歌無子夜聲論文思見老彌明坐想羅浮

山下羽衣輕 何處黔中郡遙知隔晚晴雨餘風急斷
虹橫應夢池塘春草若爲情

驀山溪 贈衡陽妓陳湘

鴛鴦翡翠小小思珍偶眉黛斂秋波儘湖南山明水秀
娉娉嫋嫋恰近十三餘春未透花枝瘦正是愁時候
尋花載酒肯落誰人後祇恐遠歸來綠成陰青梅如豆
心期得處每自不由人長亭柳君知否千里猶回首

轉調醜奴兒

得意許多時長醉賞月影花枝暴風狂雨年年有金籠
鎖定鶯雛燕友不被雞欺紅旆轉逶迤悔無計千里
追隨再來應綰蘆南印而今目下恹恹怎向日永春遲

品令送黔守曹伯達供備

敗葉霜天曉漸鼓吹催行棹栽成桃李未開便解銀章
歸報去取麒麟圖畫要及年少勸公醉倒別語怎向
醒時道楚山千里暮雲正鎖離人情抱記取江州司馬
坐中最老

踏莎行

畫鼓催春蠻歌走餉雨前一焙誰爭長低株摘盡到高
株株別是閩溪樣碾破春風香凝午帳銀瓶雪滾
翻成浪今宵無睡酒醒時摩圍影在秋江上

又

臨水天桃倚牆繁李長楊風掉青驄尾尊中有酒且酬

春更尋何處無愁地 明日重來落花如綺芭蕉漸展
山公啓欲賤心事寄天公教人長對花前醉

定風波次高左藏韻

自斷此生休問天白頭波上泛孤船老去文章無氣味
憔悴不堪驅使菊花前 聞道使君攜將吏高會參軍
吹帽晚風顛千騎插花秋色暮歸去翠娥扶入醉時肩
又次高左藏使君韻

萬里黔中一漏天屋居終日似乘船及至重陽天也霽
催醉鬼門關外蜀江前 莫笑老翁猶氣岸君看幾人
黃菊上華顛戲馬臺南追兩謝馳射風流猶拍古人肩

又荔枝

晚歲監州聞荔枝赤英垂墜壓闌枝萬里來逢芳意歇
愁絕滿盤空憶去年時 澗草山花光照坐春過等閒
桃李又纍纍辜負寒泉浸紅皺消瘦有人花病損香肌

又

準擬堦前摘荔枝今年歇盡去年枝莫是春光斲料理
無比譬如痲瘡有休時 碧甃朱闌情不淺何晚來年
枝上報纍纍雨後園林坐清影蘇醒紅裳剝盡看香肌

鵲橋仙 次東坡七夕韻

八年不見清都絳闕望河漢溶溶漾漾年年牛女恨風
波拚此事人閒天上 野麋豐草江鷗遠水老去惟便
疏放百錢端欲問君平早晚具歸田小舫

又席上賦七夕

朱樓彩舫浮瓜沈李報荅風光有處一年尊酒暫時同
別淚作人閒曉雨 鴛鴦機綜能令儂巧也待乘槎仙
去若逢海上白頭翁共一訪癡牛騃女

阮郎歸

黔中桃李可尋芳摘茶人自忙月團犀胯鬪圓方研膏
入焙香 青箬裹絳紗囊品高聞外江酒闌傳盃舞紅
裳都濡春味長

又效福唐獨木橋體作茶詞

烹茶留客駐金鞍月斜窗外山別郎容易見郎難有人
思遠山 歸去後憶前歡畫屏金博山一杯春露莫留

殘與郎扶玉山

更漏子餘甘湯

菴摩勒西土果霜後明珠顆顆憑玉兔搗香塵稱爲席
上珍號餘甘爭奈苦臨上馬時分付管回味卻思量
忠言君試嘗

繡帶子張寬夫園賞梅

小院一枝梅衝破曉寒開晚到芳園遊戲滿袖帶香回
玉酒覆銀杯盡醉去猶待重來東鄰何事驚吹怨笛
雪片成堆

撼庭竹宰太和日吉州城外作

嗚咽南樓吹落梅聞鴉樹驚棲夢中相見不多時隔城

今夜也應知坐久水空碧山月影沈西
買箇宅兒住
著伊剛不肯相隨如今果被天瞋作永落雞羣被雞欺
空恁可憐伊風日損花枝